



Pranim / Dorezuar Pamirjevoj/Prifato Received/Delivered	24.04.2023	3	vit god year
Organ / Njesia Org. / Jednica Org. / Unit	SKPMSTICK	3790/2023	113
Numri i Prot. Broj Prot. Prot. No.			
Shtesa Prilog Appendix			
Sasia Kolicina Quantity			



Republika e Kosovës
Republika Kosova-Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVA

A.nr.486/2023

Këshilli i Pavarur Mbikëqyrës për Shërbimin Civil të Kosovës- Kolegji për shqyrtimin e ankesave i përbërë nga: Malsore Gashi-Bajraktari- kryetare, Arben Mehmeti dhe Ardita Haxhnikaj-Demi-anëtarë dhe Avdyl Bekteshi-Zyrtar i Lartë për Bashkëpunim Profesional, në cilësinë e procesmbajtësit, kanë shqyrtuar ankesën me numër A.nr.486/2023 të datës 10.03.2023, të ankuesit kundër organit të punësimit/Ministria e Punëve të Jashtme dhe Diasporës, në çështjen juridike "vlerësim i rezultateve në punë", duke vepruar në pajtim me nenin 6 paragrafin 1.1 nën paragrafin 1.1, nenin 16 paragrafin 1 dhe nenin 18 paragrafin 1 nën paragrafin 1.8 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim me datë 24.04.2023, mori këtë:

V E N D I M

- I. Këshilli i Pavarur Mbikëqyrës për Shërbimin Civil të Kosovës, shpallet jo kompetent për të vendosur lidhur me ankesën me numër A.nr. 486/2023 të datës 10.03.2023, të parashtruar nga ankuesi
- II. Çështja bije në kompetencë të Gjykatës Themelore në Prishtinë/Departamenti për Çështje Administrative.

A r s y e t i m

Ankuesi me Dekret me numër DED-001-2010 të Presidentit të Republikës së Kosovës më datë 20.01.2010 është emëruar Ambasador i Republikës së Kosovës në Japoni me seli në Tokio, tutje i njëjti sipas Dekret numër DTD-004-2012 të Presidentit të Republikës së Kosovës të datës 31.05.2012 është tërhequr përkohësisht nga pozita e Ambasador i Republikës së Kosovës në Japoni, ndërsa sipas Akt Emërimit të datës 01.10.2012 është emëruar në pozitën Drejtor i Përgjithshëm në Ministrinë e Punëve të Jashtme. Me tej sipas Dekretit me numër DED-015-2013 të datës 19.08.2013 të Presidentit të Republikës së Kosovës ankuesi është emëruar Ambasador rezident i Republikës së Kosovës në Republikën e Hungarisë.

Sipas Dekretit me Nr. i Dekretit: 216/2019 të datës 18.10.2019 të Presidentit të Republikës së Kosovës ankuesi është emëruar Ambasador i Republikës së Kosovës në Konfederatën e Zvicrës me seli në Bern.

Ministrja e Ministrisë së Punëve të Jashtme dhe Diasporës ka bërë vlerësimin e rezultateve në punë për ankuesin për vitin 2022, ndërsa ankuesi i pakënaqur me këtë vlerësim më datë 10.03.2023, ka parashtruar ankesë me numër protokolli 2566/2023 në Këshillin e Pavarur Mbikëqyrës për Shërbimin Civil të Kosovës.

Këshilli i Pavarur Mbikëqyrës për Shërbimin Civil të Kosovës, bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave ankesën e ankuesit më datë 28.03.2023 e ka proceduar tek Ministria e Punëve të Jashtme dhe Diasporës. Ndërsa Këshilli më datë 30.03.2023 ka pranuar përgjigjen në ankesë nga Ministria e Punëve të Jashtme dhe Diasporës, me provat e bashkangjitura.

Kolegji për Shqyrtimin dhe Vendosjen e Ankesave pasi ka shqyrtuar provat e lëndës, ka konstatuar se Këshilli i Pavarur Mbikëqyrës për Shërbimin Civil i Kosovës, *nuk është kompetent* për të vendosur për ankesën A.nr.486/2023 të datës 10.03.2023 të parashtruar nga ankuesi, *sepse:*

Bazuar në provat e lëndës, ankuesi tashmë sipas Dekretit me numër të dekretit: 216/2019 të datës 18.10.2019 të Presidentit të Republikës së Kosovës është emëruar Ambasador i Republikës së Kosovës në Konfederatën e Zvicrës, në pajtim me nenin 84 paragrafi 4, 10 dhe 25 të Kushtetutës së Kosovës, si dhe legjislacionin e aplikueshëm për Shërbimin e Jashtëm, përkatësisht nenin 7 të Ligjit Nr.03/044 për Ministrinë e Punëve të Jashtme dhe Shërbimin Diplomatik, i ndryshuar me nenin 2 të Ligjit Nr.03/L-207 për plotësimin dhe ndryshimin e Ligjit Nr.03/L-044 për Ministrinë e Punëve të Jashtme dhe Shërbimin Diplomatik të Republikës së Kosovës, ku përcaktohet se: *7.1. Emërimi i Ambasadorëve dhe Shefave të Misioneve bëhet nga Presidenti i Republikës së Kosovës me dekret.*

Rrjedhimisht, me dispozitat e Ligjit Nr.06/L-114 për Zyrtarët Publikë, përkatësisht nenin 3 paragrafi 1 është përcaktuar se: *1. Ky ligj nuk zbatohet për: 1.1. funksionarët publikë; 1.2. funksionarët publikë me status të veçantë, ndërsa me paragrafin 2 të këtij neni është përcaktuar se: 2. Funksionarë publikë, në kuptimin e nën paragrafit 1.1 të këtij neni, janë: 2.1. të zgjedhurit; 2.2. anëtarët e Qeverisë dhe zëvendësit e tyre; 2.3. funksionarët e emëruar nga Kuvendi apo nga Presidenti i Republikës dhe titullarët apo anëtarët e organeve drejtuese kolegjiale të institucioneve të pavarura dhe të agjencive të pavarura, nga rrjedh se të emëruarit nga Presidenti i Republikës së Kosovës, siç është rasti i ankuesit kanë statusin e funksionarit publikë dhe si rrjedhojë për shkak të këtij statusi janë të përfshirë nga fusha e zbatimit të Ligjit për Zyrtarët Publikë.*

Andaj, bazuar në dispozitat ligjore të cekura si me lartë dhe duke marr parasysh se ankuesi me Dekretit me numër të dekretit: 216/2019 të datës 18.10.2019 të Presidentit të Republikës është i emëruar si ambasador dhe se objekti ankimor ka të bëjë me vlerësimin e rezultateve të punës si pasoje e ushtrimit të këtij funksioni, Kolegji i Këshillit konstaton se ankuesi gjatë periudhës së ushtrimit të funksionit të ambasadorit në Republikën e Sllovenisë nuk e ka statusin e nëpunësit civil, ngase i njëjti konsiderohet funksionar publikë për atë kohë sa Dekretit me numër të dekretit: 216/2019 të datës 18.10.2019 të Presidentit është në fuqi, dhe si rrjedhojë Këshilli i Pavarur Mbikëqyrës për Shërbimin Civil të Kosovës gjatë ekzistimit të kësaj gjendje statusore nuk ka kompetencë për shqyrtimin dhe vendosjen e ankesës A.nr. 486/2023 të datës 10.03.2023, sepse Këshilli sipas nenit 6 paragrafi 1 nën paragrafi 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, është kompetent të shqyrtoj

dhe të vendos vetëm për ankesat e nëpunësve civil dhe kandidatëve për praninë në Shërbimin Civil të Republikës së Kosovës.

Kolegji i Këshillit në këtë kontekst thekson faktin se në momentin që ankuesi lirohet nga detyra apo i përfundon mandati i funksionarit publikë i emëruar sipas dekretit presidencial, të njëjtit i linden të drejtat e parashikuara me legjislacionin e shërbimit civil, pasi që ankuesi para se të emërohet ambasador, sipas Aktit të Emërimit me numër të Aktit 098 të datës 05.09.2012 kishte statusin e nëpunësit civil që tani përcaktohet me nenin 2 paragraf 1 dhe 2 nën paragrafi 2.1 ndërlidhur me nenin 4 të Ligjit Nr.06/L-114 për Zyrtarët Publikë.

Kështu që pas konstatimit se Këshilli i Pavarur Mbikëqyrës për Shërbimin Civil të Kosovës nuk është kompetent për të vendosur lidhur me ankesën me numër A.nr. 486/2023 të datës 10.03.2023, për shkak të statusit aktual të funksionarit publikë të ankuesit, Kolegji i Këshillit duke u bazuar në Aktgjykimin në rastin nr. KI214/21 të datës 06.01.2023 të Gjykatës Kushtetuese, si dhe nenin 75 paragrafi 1 të Ligjit Nr.05/031 për Procedurën e Përgjithshme Administrative, udhëzon palën ankuese për ushtrimin e mjeteve juridike në Gjykatën Themelore në Prishtinë/Departamenti për Çështje Administrative.

Vendimi hyn në fuqi nga momenti i nënshkrimit nga Kryetarja e Kolegjit

Për sa me sipër dhe duke u bazuar në nenin 18 paragrafin 1 nën paragrafin 1.8 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi si në dispozitiv të këtij Vendimi.

Këshillë juridike: Kundër vendimit të Këshillit, pala e pakënaqur mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.486/2023

Avdyll BEKTESHI

Zyrtar i Lartë për Bashkëpunim Profesional

Malsore Gashi BAJRAKTARI

Kryetare e Kolegjit



Vendimi i dërgohet

- Ankuesit
- Sekretarit të Përgjithshëm të Ministrisë së Punës së Jashtme dhe të Diasporës;
- Udhëheqësit të Personelit në Ministrinë e Punës së Jashtme dhe të Diasporës dhe
- Arkivit të KPMSHCK-së;

